

## Vazi la Haki ya Kristo,

*Naye amepewa kuvikwa kitani nzuri, ing'arayo, safi; kwa maana kitani nzuri hiyo ni matendo ya haki ya watakatifu. Ufunuo 19:8.*

**W**ale waminifu, wanaoomba, ni kama wamefungwa pamoja na Mungu. Wao wenyewe hawafahamu jinsi wanavyolindwa kwa usalama... Lakini kama macho yao yangefunguliwa, ... wangeweza kuwaona malaika wa Mungu walioweka kambi kuwazunguka, kwa mng'ao na utukufu wao hufukuza jeshi la mwovu.

Watu wa Mungu wanapoitesa mioyo yao mbele Zake, wakisihi kwa ajili ya usafi wa moyo, amri inatolewa, “Mvueni nguo hizi zenye uchafu. Kisha akamwambia yeye, Tazama, nimekuondolea uovu wako nami nitakuvika mavazi yenye thamani nyingi” (Zekaria 3:4). Vazi lisilo na waa la haki ya Kristo linawekwa juu yao waliojaribiwa, wakashakiwa na bado wakabaki kuwa watoto wa Mungu waaminifu. Masalia waliotwezwwa wanavikwa vazi la utukufu, ambapo kamwe hawatanajisiwa tena upotovu wa ulimwengu. Majina yao yanabaki katika kitabu cha uzima cha Mwana-kondoo, wakiandikwa miongoni mwa waaminifu wa vizazi vyote. Wamecupinga ujanja wa mdanganyi; hawajauacha uaminifu wao kwa sababu ya ngurumo ya joka. Sasa wako salama milele kutoka kwa hila za mjaribu. Dhambi zao zimehamishiwa kwa mwasisi wa dhambi. Na masalio hawajasamehewa na kukubaliwa tu bali wanaheshimiwa pia. “Kilemba kizuri” kinawekwa vichwani mwao.

Wanapaswa kuwa kama wafalme na makuhani kwa Mungu. Wakati Shetani alipokuwa akishinikiza mashtaka yake na akitafuta kuangamiza kundi hili, malaika watakatifu, wasioonekana, walikuwa wakipita huku na kule, na kuweka juu yao muhuri wa Mungu aliye hai. Hawa ndio wale wasimamao juu ya mlima Sayuni pamoja na Mwana-kondoo, wakiwa na jina la Baba limeandikwa katika vipaji vya nyuso zao. Nao wauimba wimbo mpya mbele ya kiti cha enzi, wimbo ule ambao hakuna mwanadamu anayeweza kujifunza, waliokombolewa mia moja na arobaini na nne elfu, waliokombolewa kutoka duniani. “Hawa ndio wamfuatao Mwana Kondoo kila aendako. Hawa wamenunuliwa katika wanadamu, malimbuko kwa Mungu na kwa Mwana Kondoo. Na katika vinywa vyao haukuonekana uongo. Maana hawana mawaa” (Ufunuo 14:4, 5).

Sasa unafikiwa utimilifu kamili wa yale maneno ya malaika “Sikiliza sasa, Ee Yoshua, wewe na wenzako waketio mbele yako; maana hao ni watu walio ishara; kwa maana, tazama, ninamleta mtumishi wangu, aitwaye Chipukizi” (Zekaria 3:8). Kristo anafunuliwa kama Mkombozi na mwokozi wa watu Wake. Hawa hasa ni masalio “watu walio ishara” kadiri ambavyo machozi na fedheha ya safari yao yanavyopisha furaha na heshima mbele ya Mungu na Mwana-kondoo. “Siku hiyo Chipukizi la Bwana litakuwa zuri, lenye utukufu, na matunda ya nchi yatakuwa mema sana, na kupendeza, ... Tena itakuwa ya kwamba yeye aliyebaki katika Sayuni, na yeye aliyeachwa ndani ya Yerusalemu, ataitwa mtakatifu” (Isaya 4:2, 3) (Testimonies for the Church 5:475, 476).